

06/09/2004

Budaya sesuai penting dalam pembangunan sumber manusia

KUALA LUMPUR: Budaya yang sesuai penting dalam pembangunan sumber manusia ke arah mencapai hasil yang terbaik, kata Tun Dr Mahathir Mohamad.

Bekas Perdana Menteri itu berkata, jika budaya yang sesuai disemai, kualiti akan menyusul dengan sendirinya.

Dr Mahathir memetik Jepun sebagai contoh yang menurutnya keupayaan negara itu untuk cemerlang dalam proses perindustrian bergantung kepada sistem nilai dan budaya mereka.

"Rasa malu yang mendalam membuatkan mereka berusaha untuk kesempurnaan.

Untuk itu mereka sedia belajar dengan tekun, menumpukan masa dan mengulang beberapa kali sehingga mereka mencapai kesempurnaan sebaik mungkin.

"Jika kita dapat menyemai nilai tinggi ini dalam tenaga kerja kita, maka pembangunan sumber manusia akan mencapai keputusan cemerlang. Ia memang akan mengambil masa yang lama tetapi ia bukan mustahil," katanya dalam ucapan pada forum Persatuan Peminat dan Seni Salleh Tahir (STAFSA) di Iskandariah, Mesir semalam.

Salinan teks ucapannya di e-melkan kepada Bernama di sini.

Dr Mahathir juga berkata masalah serius akan berlaku jika pembangunan sumber manusia tidak dilaksanakan di negara ini.

"Negara seperti Malaysia yang berhasrat mengubah ekonomi pertanian kepada perindustrian akan berhadapan dengan banyak cabaran sosial memandangkan demografi negara ini dipaksa berubah bagi memenuhi kehendak persekitaran perindustrian," katanya.

Dr Mahathir berkata peralihan daripada ekonomi pertanian kepada industri juga memerlukan perubahan minda di kalangan rakyat keseluruhannya.

"Satu budaya baru perlu dibentuk dan diperkenalkan. Ini sangat penting dalam negara Islam yang normanya ortodoks dan konservatif," katanya.

Dr Mahathir berkata keupayaan rakyat untuk melakukan sesuatu mungkin sama tetapi perbezaan dalam keupayaan untuk melaksanakan kerja yang sesuai dengan kualiti produk yang sama selalunya berbeza.

"Perbezaan ini berlaku kerana pengaruh budaya, sistem nilai dan kesan tumpuan terhadap kerja pada mana-mana tahap, daripada eksekutif utama kepada buruh," katanya.

Bercakap mengenai pentingnya bahasa Inggeris, Dr Mahathir berkata dalam dunia hari ini keupayaan untuk memahami bahasa itu adalah satu aset memandangkan pelabur dari luar tidak memahami bahasa tempatan.

"Antara sebab Malaysia berjaya dalam menarik pelaburan langsung asing ialah hakikat bahawa rakyat Malaysia memahami bahasa Inggeris walaupun tidak dapat bertutur dengan baik dalam bahasa terbabit," katanya.

(END)